

**MESYUARAT PERTAMA PENGGAL PERTAMA
DEWAN UNDANGAN NEGERI PULAU PINANG
YANG KEEMPAT BELAS
02 OGOS 2018**

PERKARA : 4(B)(XVI)1

**SOALAN BERTULIS OLEH AHLI KAWASAN SUNGAI DUA
YB. MUHAMAD YUSOFF BIN MOHD NOOR**

1. Kerajaan Pusat berura-ura untuk memansuhkan bantuan sara hidup kepada nelayan dan subsidi petani.
 - (a) Apakah langkah yang akan diambil oleh Kerajaan Negeri untuk membantu nelayan dan petani jika ini berlaku?
 - (b) Apakah program yang dirancang untuk meningkatkan pendapatan petani & nelayan di Negeri Pulau Pinang?

**YB. DR. AFIF BIN BAHARDIN
MENJAWAB BAGI PIHAK Y.A.B. KETUA MENTERI**

1. Sehingga kini, Kerajaan Negeri tidak menerima sebarang makluman atau arahan mengenai pemansuhan subsidi kepada petani dan nelayan.
 - (a) Kerajaan Negeri melalui Jabatan Pertanian, Jabatan Perikanan dan Lembaga Kemajuan Ikan Malaysia (LKIM) akan terus membantu petani dan nelayan melalui pelbagai program dan pembangunan dalam bentuk pemberian insentif serta perkhidmatan mengembangkan aktiviti pertanian dan perikanan.
 - (b) Kerajaan Negeri melalui Jabatan Pertanian Negeri sentiasa memberi penekanan terhadap peningkatan hasil pengeluaran dan kualiti produk pertanian dengan penggunaan teknologi

pertanian moden dan melalui penyampaian perkhidmatan pengembangan pertanian. Buat masa kini, pihak Jabatan Pertanian Negeri sedang berusaha untuk meningkatkan hasil pengeluaran padi daripada 5.8 metrik tan per hektar kepada 7.0 metrik tan per hektar dalam tempoh dua tahun akan datang. Selain itu, bagi tanaman selain tanaman padi iaitu buah-buahan dan sayur-sayuran, peningkatan sebanyak 10% disasarkan bagi setiap tahun. Peningkatan hasil pengeluaran padi, buah-buahan dan sayur-sayuran secara langsung akan meningkatkan pendapatan petani.

Untuk meningkatkan pendapatan nelayan pula, Kerajaan Negeri menyediakan pelbagai bantuan untuk membela nasib nelayan di Negeri Pulau Pinang. Antara bantuan yang telah dijalankan adalah seperti berikut:-

- (i) Bantuan *touch point* berupa peralatan keselamatan nelayan;
- (ii) Program *Agroprenuer* Muda bagi membantu dan menggalakkan penglibatan golongan belia dalam bidang keusahawanan berasaskan aktiviti pertanian merangkumi semua aktiviti di dalam rangkaian nilai industri pertanian seperti tanaman, ternakan, perikanan, industri asas tani termasuk pemasaran, khidmat sokongan dan agro pelancongan;
- (iii) Program Tabung Usahawan Tani yang memberikan kepada para pengusaha terutamanya golongan muda dan belia berumur 40 tahun ke bawah untuk menjadikan sektor industri asas tani sebagai kerjaya dan berpotensi sebagai punca pendapatan yang lumayan;
- (iv) Geran Pemadanan *Change Upgrade Product* (CUP) dan Geran Penuh Industri Asas Tani (IAT) bagi membantu pengusaha kecil dalam mempertingkatkan produk keluaran syarikat masing-masing, untuk membesarkan perniagaan, pembelian mesin dan sebagainya;

- (v) Melaksanakan Program Tukun Tiruan bertujuan untuk menambah tempat pembiakan ikan yang secara langsung akan meningkatkan sumber perikanan terutama di kawasan pesisiran pantai di Pulau Pinang; dan
- (vi) Melaksanakan Program Bantuan Pukat bagi Nelayan Pesisir Pantai Pulau Pinang sejak tahun 2013 di mana sehingga kini, sebanyak 8 siri bantuan telah diadakan.

Dalam masa yang sama, Kerajaan Negeri juga dalam perancangan untuk menganjurkan program-program promosi industri asas tani yang bertujuan membantu meningkatkan ekonomi golongan petani, penternak dan nelayan. Antara program-program yang sedang dirancang adalah seperti berikut:

- (i) Program Seberang Perai Fiesta 2018 yang merupakan acara tahunan bakal menghimpunkan usahawan-usahawan industri asas tani yang secara tidak langsung meningkatkan jualan produk-produk pertanian, penternakan dan perikanan; dan
- (ii) Penyertaan Kerajaan Negeri Pulau Pinang ke Pameran Pertanian, Hortikultur dan Agro Pelancongan Malaysia 2018 (MAHA 2018).